

Mbanjhingbingz:

Vunz Gvai Dieg Gyaueu Yiengh Gingj Yinxvunz

人杰地灵风景秀丽的兴坪渔村

□ Laoz Lwogj Lizswj ingj

Canghdkwbya ndaw mbanj daiq roeglaxceiz bae dwkbya.

Hinghbingz ing bya dep raemx, gingsaek gyaueudei comzcwk, gij ranz ndaw mbanj ciengz hau vax nding, luengqgai aeu benjrin bu ndaej bingzbwd, dwg rangh haenzdah Dahlizgyangh aen hawgeq ceiq gyaueudei ndeu. Ndaw gyaiq hawgeq mboujdan miz Byavehgoujmax, ngaueuz dauqdingq Vangzbu, hoz-siengh naezgu doxraen, gingj ndei Yalungz, goenglaux hen Makbingzgoj, gingsaek Langsiz, byaleix venj dat, Byabitsaenz, Byasae doenghgiy gingjdenj gyaueudei neix, lij miz aen Mbanjhingbingz vunz gvai dieg gyaueu yiengh gingj yinxvunz neix.

Hinghbingz Cin dieg youq haenzdah baihdong Dahlizgyangh, liz Gveilinz Si 63 goengleix gyae, liz yienhsingz Yangzsoz 27 goengleix gyae, dwg ciuhgeq haenzdah Dahlizgyangh aen hawsingz ceiq hung ndeu. Mbanjhingbingz dwg aen mbanj gaeuqgeq ndeu, daengx aen mbanj gaeuq ciemq dieg 1.5 gunghgingj, miz ranzgaeuq cienzdoengj 48 aen, youq gunghyenz 1506 nienz seiz Ciuhmingz ndawbi Vanliz couh laeb mbanj, daengz seizneix gaenq miz seiq bak lai bi lizsij. Gij ranz ndaw mbanj cien heu vax ndaem, dingj-ranzlingq, ciengzgyaeujmax, yiemh-ranz gungjgaeu, diuzliengz veh veh, aencueng deu va, doxdep doxdaeb baizlele, yiengh gyaqdaep daegbied, daegsaek ranzyouq vunz Gveiqbaek seiz Ciuhmingz Ciuhcingh mingz-yienj, seiq bak lai bi gvaqbae, ginggvaq le gij hoenxcienq Ciuhmingz Ciuhcingh, ciengz hoenxcienq Cungguk hoenx Yizbwnj, ciengz hoenxcienq gaijfang caeuq vwnzva dagwzming, lij louzce ndaej haemq ndei, saedcaih mbouj yungzheih.

Mbanjhingbingz naj mbanj Dahlizgyangh hopngomx, baihdah doiqnaj rangh bya daengjdwt sangvid doxing doxdaeb baenz caengz, Bya-byaleix, Byavaxgim, Byayenzbauj, Byacaxgiemq, Bya'gyaqbit "Byahaj-lwgfwngz" daengj bongh hwnj sang, yienghsiengq aen mbouj doengz aen, hawj vunz yawj dwk simdoengh; Byahozmax, Mbanjraemxmbwn henz-gyawj bya sang raemx saw, gij bya goengq beij goengq geizheih yung-

yiemj, hawj vunz caenh siengj bae bin daengz dingj mbat he.

Mbanjhingbingz dwg aen "dieggviq" ndeu, daj laeb mbanj gvaqdaeuq, moix aen ciuzdaih cungj miz vunz dang hak roxnaeuz fouqmiz. 1921 nienz, goeng daihcungjdungj Cunghvaz Minzgoz seizhaenx Sunh Cunghsanh daiq gak cungj ruz 300 lai aen, daj Vuzcouh nyig raemxdah doxhwnj, yaek bae Gveilinz laeb-baenz aen dabwnjyngz okbing hoenx coh baihbaek haenx, gvaq Mbanjhingbingz seiz youq ndaw mbanj yietnaiq haemh ndeu. Youq bi 1998 ndwen 7 ngoenz 2, goeng cungjdungj Meijgoz seizhaenx Gwzlinzdun daj Gveilinz swnh raemxdah doxroengz, daegdaengq bae cunzyawj le Mbanjhingbingz, caemhcai daj seizhaenx

doiq gij ranzcaep gaeuqgeq Cungguk gig miz yinx hwnjdaeuq, gij saeh Gwzlinzdun cunzyawj Mbanjhingbingz doenggvaq gwnz seiqgyaiq gij conzmeiz hung haenx baudauj okbae le, aen mbanj iq neix hix engq okmingz lo.

Bae daengz Mbanjhingbingz, mwngz cawz yawj gingj ndei ra riz geq aenmbanj le, lij ndaej caeuq gyoengq canghdkwbya ndaw mbanj vad ruz roengz dah bae dwkbya, gvaq mbat saedceij canghdkwbya vad aen bez ndeu fouz biu gwnz dah, gyaep roeglaxceiz ndaem roengz laj raemx gaeb bya, caiq cimz gwn gij byadah noh oiup singhsien feihhom haenx, gij cwxcailh gij angq haenx cix nyoenx hwnj fajnaj ndei yawj mwngz daeuq.....



▲ Bakdou hung aen hag-dangz gaeuqgeq ndaw mbanj.

► Gij gingj henz mbanj ndaej yaenq gwnz mbaw ngaenz 20 maenz.




▲ Gyoengq hekyouz caenx haeuj ndaw mbanj cimh riz gaeuqgeq.



▲ Ranzgaeuq, roenbenjrin gyoeb baenz hot fwen ciuhgeq ndeu.



▲ Ranz gaeuqgeq ing youq ndaw rungj goengqbya.



▲ Gyoengqvunz comz naengh youq henz luengqhongh gangigoj.



▲ Gij saedceij vunzmbanj andingh vuenyungz.



▲ Gij ranz song henz roen yienj ok riz lizsij gyaenanz.



▲ Gyoengq mbauqsau ndaw mbanj caemh gyaenz yienjheiq.